



**Anuncio da Secretaría Xeral de cultura pola que se lles informa ás persoas físicas e xurídicas dedicadas profesionalmente á dinamización cultural da apertura do Catálogo Ler conta moito 2018, para que poidan incorporar as súas actividades de animación á lectura, co obxecto de que os titulares de bibliotecas públicas poidan solicitálas para a realización de actividades de dinamización bibliotecaria e cultural para o ano 2018.**

### **Antecedentes**

A Lei 17/2006, do 27 de decembro, do libro e da lectura de Galicia (DOG núm. 7, do 10.01.2007) ten entre outros como obxecto promover a extensión social da lectura e promocionar o libro e a lectura en galego. Deste xeito, establece, no seu capítulo IV art. 22.2, o fomento da lectura nas bibliotecas e di que a Xunta de Galicia, en coordinación coas bibliotecas públicas, coas bibliotecas escolares e coas de interese público do país, elaborará programas de fomento da lectura, xa sexa para o conxunto da poboación ou dirixidos a sectores específicos desta.

A Lei 5/2012, de 15 de xuño, de bibliotecas de Galicia (DOG núm. 122, do 27.06.2012), establece no artigo 20, que é función das bibliotecas públicas desenvolver actividades de creación ou difusión cultural e de promoción da lectura.

Deste modo a Consellería de Cultura, Educación e Ordenación Universitaria, a través da Secretaría Xeral de Cultura, co fin de favorecer os hábitos lectores do conxunto da cidadanía, vai desenvolver ao longo do ano 2018 o programa LER CONTA MOITO na Rede de Bibliotecas Públicas de Galicia.

Con esta programación, a Xunta de Galicia pretende contribuír á promoción da lectura como un vehículo de enriquecemento e de aproveitamento persoal, para o que ofrece espazos de encontro para descubrir e compartir. LER CONTA MOITO ten como obxectivo animar á lectura a través do desenvolvemento de accións atractivas vinculadas aos intereses dos distintos colectivos, que faciliten o achegamento a ese mundo completo que poden atopar nos espazos bibliotecarios, tanto a través dos libros como a través dos materiais audiovisuais e informativos.

LER CONTA MOITO ofrecerá a través das bibliotecas públicas un conxunto de actividades para achegar a cidadanía á lectura e á información. O desenvolvemento destas actividades de dinamización no ámbito da biblioteca reforzan o seu carácter de espazo de relación, aberto e participativo, ao tempo que alentan a aprendizaxe e a descuberta de novos temas e reflexións a través dos recursos que estes centros públicos de lectura ofrecen.

En consecuencia,

**RESOLVO**



### **Primeiro. Obxecto**

O obxecto desta resolución é informar ás persoas físicas ou xurídicas dedicadas profesionalmente á dinamización cultural da apertura do Catálogo LER CONTA MOITO 2018.

Este catálogo incorporará actividades de dinamización bibliotecaria e cultural e se porá á disposición dos titulares de bibliotecas públicas co obxecto de que poidan seleccionar as actividades culturais que integrarán a programación de dinamización bibliotecaria e cultural das súas bibliotecas.

### **Segundo. Destinatarios**

Persoas físicas ou xurídicas (profesionais autónomos, empresas, asociacións etc.) dedicadas profesionalmente á dinamización cultural, particularmente no ámbito da lectura, que desexen presentar as súas actividades, deseñadas de acordo cos requirimentos previstos no punto 3ª e 5º deste anuncio.

### **Terceiro.- Condicións xerais para a incorporación ao Catálogo *Ler conta moito* 2018.**

1. As persoas físicas ou xurídicas que desexen participar no Catálogo LER CONTA MOITO 2018, deberán cumprir os seguintes requisitos xerais :

- Figurar dado de alta no Imposto de Actividades Económicas (IAE), nun epígrafe da sección 1ª, división 9, epígrafes 93, 96, 98, 99, da sección 2ª, división 8, epígrafes 82, 85, 86, 88, 89, da sección 3ª, ou noutra na que conste o seu carácter fundamentalmente de entidade de dinamización cultural.

- Ou estar inscritas no Rexistro de Asociacións da Xunta de Galicia como Asociación Cultural.

- Manifestar expresamente a aceptación da integración no Catálogo.

2. A documentación xustificativa do cumprimento destas condicións enviarase anexa á solicitude, sexa por vía electrónica ou presencial a través dun rexistro oficial.

3. Se algunha persoa física ou xurídica nalgún momento do período de vixencia do Catálogo 2018 non cumpre cos requisitos mencionados, deberá comunicalo á Secretaría Xeral de Cultura, que anulará o seu dereito de permanecer no Catálogo Ler conta moito 2018 ata que regularice a súa situación.

### **Terceiro. Presentación das solicitudes e prazo**

1. As solicitudes presentaranse preferiblemente por vía electrónica a través da plataforma accesible desde a páxina <http://rbgalicia.xunta.gal>, Catálogo Ler Conta moito 2018.



Opcionalmente, poderanse presentar as solicitudes presencialmente en calquera dos lugares e rexistros establecidos na normativa reguladora do procedemento administrativo común, a través do formulario establecido para tal uso que se poderá descargar da páxina <http://rbgalicia.xunta.gal>, Catálogo Ler Conta moito 2018.

2. As solicitudes presentaranse no prazo de 10 días, contado a partir do día seguinte ao da publicación deste anuncio.

#### **Cuarto. Condicións para a inscrición de actividades no Catálogo**

1. Deberase cubrir a totalidade do formulario establecido para tal uso, achegando a seguinte información preceptiva:

1. Nome artístico ou nome da empresa
2. Nome da actividade
3. Categoría na que engloba a actividade
4. Público ao que vai dirixida
5. Duración da actividade e número de sesións
6. Prezo da actividade
7. Resumo: descrición detallada da actividade e do seu desenvolvemento
8. Necesidades técnicas: especificar necesidades coas que debe contar a biblioteca para poder realizar a actividade
9. Experiencia profesional en dinamización da lectura: breve resumo das actividades profesionais previas no campo da dinamización da lectura.
10. Disponibilidade temporal e xeográfica
11. Tres fotografías de alta calidade en formato dixital

2. A solicitude de inclusión no catálogo presentarase unha soa vez. No caso de achegar varias propostas de actividades, é preciso presentar a información complementaria de cada unha delas.

3. Desestimaranse automaticamente as solicitudes que non se axusten estritamente aos requisitos das epígrafes anteriores e os expedientes arquivaranse sen máis trámite.

4. Límite no número de propostas de actividades:

Cada ofertante poderá presentar un máximo de dúas (2) ofertas para o catálogo de 2018.

5. Límite económico das actividades:

O custo máximo de cada actividade non poderá exceder dos 500 euros (impostos incluídos).

No caso das actividades desenvolvidas en varias sesións, o importe total respectará ese mesmo límite de 500 € (impostos incluídos). Na inscrición da actividade especificarase



o custo total e o de cada sesión. No orzamento presentado entenderase que están incluídos todos os gastos derivados (desprazamentos, materiais empregados, etc.).

#### **Quinto. Características das actividades de dinamización da lectura**

1.- As actividades dirixidas á promoción da lectura que se oferten deberán axustarse, preferentemente, a algunha das seguintes **categorías**:

a.- **Obradoiros creativos**: obradoiros de escritura, de banda deseñada, de audiovisual, de encadernación, de oralidade, de ilustración e calquera outros relacionados co ámbito da lectura e a escritura.

b.- **Narración oral**: contacontos, lecturas en voz alta, recitais poéticos, regueifas e similares.

c.- **Divulgación do coñecemento**: charlas sobre temas de actualidade, de divulgación científica, de interese social, encontros co autor, ciclos temáticos, actividades destinadas a dar a coñecer a actividade cultural e social da localidade e todas aquelas iniciativas cuxo obxectivo sexa a transmisión de coñecemento.

d.- **Audiovisual na biblioteca**: proxeccións, audicións, ciclos arredor do cine, linguaxes audiovisuais e calquera outra proposta que teña como obxectivo a divulgación da música, o cinema de ficción e documental ou animar á videocreación.

e.- **Actividades de dinamización con música, teatro e danza**: formatos de palabra en movemento para espertar a curiosidade pola lectura ou para achegarse aos autores, libros e temas de actualidade sobre os que explorar na biblioteca.

f.- **Exposicións**: mostras sobre temas de actualidade, obras, autores, ilustradores ou calquera outra de interese para os usuarios das bibliotecas.

g.- **Itinerarios guiados**: percorridos colectivos para descubrir, a pé, escenarios literarios e espazos históricos da localidade e promover un interese por afondar neles.

2.- As actividades propostas deberán delimitar os públicos ós que van dirixidas. Para elo establécense as seguintes opcións:

- Bebés: 0 a 3 anos.
- Nenos e nenas (deberase especificar a faixa de idades principal): de 4 a 11 anos
- Mocidade: de 12 a 18 anos
- Adultos: maiores de 18 anos
- Colectivos con necesidades especiais (especificar cales)

3.- As actividades propostas poderán ser dunha sesión ou de desenvolvemento en varias sesións (por exemplo, os obradoiros, ciclos, etc.).



4.- Prioritariamente ofreceranse propostas vinculadas ás datas culturais sinaladas no Calendario do libro e da lectura 2018, aínda que tamén se poderán incluír propostas referentes a outras datas.

5.- Todas as actividades ofertadas deben establecer relación directa e explícita cos fondos da biblioteca (libros, música, información na rede, publicacións periódicas, audiovisual, banda deseñada, etc.), de maneira que se favoreza un interese posterior por estes fondos por parte dos participantes, ou que se lles facilite, de maneira lúdica e divertida, información sobre o uso da biblioteca.

6.- As actividades inscribíranse e desenvolveranse en galego, segundo as normas ortográficas establecidas pola Real Academia Galega.

7.- Os ofertantes deberán definir a proposta da súa actividade de acordo co esquema facilitado na plataforma de inscrición, na que cómpre cubrir a totalidade dos requirimentos. Acompañarase dunha breve descrición da experiencia profesional no campo da dinamización da lectura.

8.- A proposta acompañarase de tres fotografías de alta calidade (en formato dixital) que ilustren a actividade, coa conformidade de cesión de dereitos para uso desas imaxes, que poderán empregarse para a difusión pública do programa por calquera canle ou medio de comunicación e información social.

9.- O proxecto descritivo da actividade deberá ir acompañado dun conxunto de propostas complementarias, sinxelas e sen custo, que poidan desenvolver as propias bibliotecas que as programen, para contribuír así a un maior aproveitamento desta: títulos de libros que poden estar vinculados á actividade, proposta de carteis ou formato informativo para crear unha expectativa sobre esa actividade, mostra de libros, etc., así como algunha outra acción de reforzo con posterioridade á realización desta actividade.

Esta proposta xenérica, que se definirá na propia ficha de descrición da actividade, deberá concretarse no momento da realización coas persoas responsables de cada unha das bibliotecas que programen esa actividade, de acordo coas especificidades da biblioteca en cuestión.

10. As actividades que non reciban ningunha solicitude de desenvolvemento polas bibliotecas nesta convocatoria ou sexan cualificadas como de deficiente ou baixa calidade, poderán seren excluídas do seguinte Catálogo.

**Sexto. Publicación e obrigas dos integrantes do Catálogo de actividades Ler conta moito 2018**



1. O catálogo do programa LER CONTA MOITO 2018 será publicado na páxina web da secretaría xeral de Cultura, [cultura.xunta.gal](http://cultura.xunta.gal), e na da Rede de Bibliotecas de Galicia <http://rbgalicia.xunta.gal>, ademais das canles que determine a secretaría xeral de Cultura para a súa difusión.

2. As persoas físicas ou xurídicas integrantes do Catálogo quedan obrigadas a:

- Facilitar toda a información que lles sexa requirida polos órganos de control da comunidade autónoma.

3. Calquera alteración dos datos que figuren no inscrición e calquera outro incumprimento das normas contidas nesta resolución terá como consecuencia a retirada do Catálogo.

#### **Sétimo. Autorización**

As persoas físicas ou xurídicas integrantes do Catálogo autorizan a Consellería de Cultura, Educación e Ordenación Universitaria para publicar os datos necesarios para confeccionar o Catálogo LER CONTA MOITO 2018.

#### **Octavo. Pagamento**

As Entidades Locais, titulares de bibliotecas e/ou axencias de lectura públicas que soliciten actividades de dinamización a través do Catálogo serán as encargadas de realizar o pagamento de cada actividade realizada.

Santiago de Compostela, 1 de febreiro de 2018